

應州續志卷之八

應州知州南豐吳炳纂輯

人物志

先賢

文苑

列女

流寓

攷通志三晉人物以道德功業文章顯著者後先相望
卽雲中一郡自漢迄明賢材輩出雖名垂青史無俟州
邑乘始傳然而鄉之獻卽民之望司事者紀述寂寥其
何以闡既往之幽潛垂方來之模範耶古人云作史貴
乎識夫衡輕重審去留者識也舊志於先賢登載蓋不
能無歉云至俎豆宮牆明侯復而下至鮑承先已確鑿

應州續志

卷八

一

可憑其五代宋暨遼金諸人疑係田志附會然無冊籍
可稽有舉無廢禮也惟賀拔允非應產不宜濫廁耳次
人物

先賢

後唐

安重誨應州人父福遷事晉爲將以驍勇知名晉兵救朱宣福遷戰死重誨少事明宗爲人明敏謹恪明宗鎮安國以爲中門使及兵變於魏所與謀議皆重誨與霍彥威決之明宗卽位爲左領軍衛大將軍樞密使兼領山南東道節度使固辭不拜改兵部尙書使如故在位六年累加侍中兼中書令後被讒得罪死重誨自爲中門使已見親信而以佐命功臣處機密

應州續志

卷八

一一

之任事無大小皆所參決其盡忠勞力時有補益而旁無正人君子之助其獨見之慮禍釁所生至於臣主俱傷幾滅其族斯其可哀者也 按五代史重誨欲內計國家外制諸侯謂潞王從珂非李氏子後必爲國家患欲陰圖之未果臨死嘆曰恨不與國家除去潞王後從珂果反弑愍帝自立

宋

郭崇應州金城人重厚寡言有方畧後唐清泰中爲應州騎軍都校晉祖割雲應入契丹奮身南歸歷鄆河

中路三鎮騎軍都校開運中戍太原會漢祖起以崇
爲先鋒入汴改護聖左第六軍都校領郢州刺史改
領富州從周祖平河中以功遷果州防禦使領護聖
右廂都指揮使周祖鎮鄴以崇領行營騎軍兼天雄
軍都巡檢使乾祐三年冬從周祖走慕容彥超於劉
子陂補侍衛馬軍都指揮使廣順初領定武軍節度
又爲京城都巡檢使修城都部署兼知步軍公事未
幾命爲陳州節度加同平章事出鎮澶州促還鎮所
世宗初并人侵潞命與符彥卿出固鎮以禦之世宗

親征又副彥卿爲行營都部署加兼侍中冬移正定
尹成德軍節度四年契丹騎萬餘掠邊崇率衆攻下
束鹿縣斬數百級俘獲甚衆五年來朝賜襲衣金帶
器幣鞍勒馬恭帝加檢校太師宋初加兼中書令崇
追感周室恩遇時復泣下監軍陳思誨密奏之太祖
曰我素知崇篤於恩義蓋有所激發耳遣人覘之還
言崇方對賓屬坐池潭小亭飲博城中宴然太祖笑
曰果如朕言未幾來朝改命爲平盧節度乾德三年
卒年五十八贈太師子守璘洛苑副使妻卽明德后

姊也子允恭以父任授殿直至崇儀副使知常州卒
次女爲仁宗后天聖三年詔贈尚書令兼中書令守
璘太尉寧國軍節度兼中書令允恭忠武軍節度兼
侍中允恭子中庸左侍禁 門祇候副使中和娶潁
川郡王德彝女爲西染院副使 舊志載後周悞
周廣字大均應州神武川人父密晉鄜延晉三鎮節度
使周廣順初至太子太師致仕廣幼從父爲牙校漢
初授供奉官尋擢左千牛衛將軍周祖討慕容彥超
爲行營都監錄功遷右武衛俄改右神武充鎮淮軍

應州續志

卷八

四

兵馬都監從征淮南令安集江北數州民甚德之因
領常州刺史兼內外馬步軍都軍頭淮南平改領眉
州宋初授隰州刺史乾德三年遷潘州團練使令訓
練雄武諸營開寶二年從征太原爲攻城樓櫓戰櫂
都部署師還加內外馬步軍副都軍頭六年改右屯
衛大將軍領郡如故太平興國二年卒
李重誨應州金城人祖高後唐莊宅使獎州刺史父彥
榮仕遼署環州刺史重誨嘗爲應州馬步軍都指揮
使太平興國五年從節度使蕭咄李逆潘美戰於代

出境曰良吏也權乾州節度使卒謚忠肅天會七年

贈侍中正隆三年改贈特進道國公

按公弼卒於金
依通志列金代

高汝勵字巖夫應州金城人登大定十九年進士第蒞

官有能聲累除同知絳陽軍節度事明昌五年陞石

州刺史承安元年入爲左司郎中擢左諫議大夫尋

同知大興府事歷陝西東路轉運使泰和元年改西

京路轉運使二年轉北京臨潢府按察使四年又轉

河北西路轉運使十一月進中都路都轉運使六年

六月拜戶部尚書貞祐二年宣宗南遷次邯鄲拜叅

應州續志

卷八

七

知政事尋遷尚書右丞四年三月拜平章政事俄進

尚書右丞相監修國史封壽國公屢乞致仕不允十

月遷榮祿大夫哀宗初告老優詔不許正大元年三

月卒年七十一配享宣宗廟廷汝勵慎密廉潔能結

主知在相位十餘年規守格法循默避事未嘗有譴

訶士論頗以貪戀不去譏之

俱見
金史

舊志封榮國公

誤

元

李伯述應州人至正閒爲河南省左丞卒於兵追封魏

一國公謚忠愍
志通

明

侯復應州人洪武丙子舉人授國子監監丞遷翰林院編修仍兼監丞事尋晉國子監司業前後三蒞國學正身率物人士翕然宗之 田志入祀鄉賢

寇謙應州人永樂甲午舉人授戶科給事中時相頗專擅方得上寵謙抗章糾之風生朝宁 田志入祀鄉賢

郭頤應州人永樂中貢生由知縣擢監察御史出按京

應州續志

卷八

八

畿文皇帝北征抗疏力爭後復屢疏言事朝右咸側目遂拂衣歸 田志入祀鄉賢

石瑁字信之應州人數歲知孝友父兄皆奇之領宣德己酉鄉試癸丑成進士觀政戶部收通州倉糧宿弊悉釐革正統初授禮科給事中擢金華知府鄰郡盜起出兵擊之民避盜者千百爲羣乏食瑁開倉以濟衆爲歌謠頌之以祖母喪去任都御史軒倪言於朝起原官荐升福建右布政使上聞其賢以爲南京禮部左侍郎未幾召爲禮部尚書靖共於位朝望益孚

一甫一載而卒年六十有四

按李賢神道碑瑁以祖母喪去任通志謂丁母憂去

悞

田志入祀鄉賢

田天澤應州人宏治壬子舉人授定興令時流賊圍定興攻城幾陷天澤督兵拒走之陞上林苑左監丞尋陞耀州知州有巨璫挾寵恣睢陝西諸郡多被科索跡且至耀天澤曰他州自有耀州自無堅拒之民不為擾丁外艱服闋起補疾作蕭寺中竟不起贈通議大夫

按孫丕揚傳天澤服闋起補卒於京通志謂致政歸卒悞

田志入祀鄉賢

田蕙應州人萬歷甲戌進士任蒲城縣知縣陞戶部主

應州續志

卷八

九

事歷通政司左右叅議升通政使性剛直不阿為忌者所中歸里杜門謝客躬耕訓讀士論多之 按孫

繼臯墓誌謂歷通政使通志謂歷左右叅議歸誤

以上

俱見通志

國朝

鮑承先應州人世襲安東衛指揮明萬歷時任開原副總兵加都督僉事遼陽陷沒糾集殘兵守大小黑山援三分河兵潰被傷棄職入遼陽之首山
太祖高皇帝聞之遣使召見賜賚優渥

太宗文皇帝知其賢授祕書院大學士予阿達哈哈番世襲
罔替改吏部承政以病乞休

世祖章皇帝入定中原召見殿上問以治道備陳新政請祖
堯舜以行仁法湯武以除暴賜蟒幣鞍馬以江南三
楚滇黔閩粵遺氛未靖命往經畧未赴以疾卒

世祖皇帝聞之痛悼遣大學士范文程等視含殮又遣官賜
祭居鄉多義舉士民景慕其德大同府學及大同應
州兩學俱崇祀鄉賢

家譜

炳按蕭志先賢原傳俱刪去不載甚不可解夫史家

應州續志

卷八

十

之體有一人而父子兄弟祇須附見難以分載者或
提敘傳首或補書傳尾雖一人而家之世次盛衰畧
備如郭崇李重誨周廣邢抱朴之類皆是也今刪去
原傳既於本人家世未詳亦於志傳體例不合通志
載全省人物尙備錄原傳何獨州志而疎謬如此舊
志載北齊賀拔允爲應人攷北史允神武尖山人魏
書神武屬朔州領縣二尖山殊類尖山卽今寧武縣
見通志是允非應人明矣况允祖尒頭父度拔弟勝
岳二人俱見北史有名當時又不宜錄允一人而遺

其他通志載允祖父兄弟俱入寧武則州志人物之
首當削去允名萬無疑義者也

元

曹之謙字益甫應州人興定閒進士文名著於金元閒
寓居平陽三十載與諸生講學一以伊洛爲宗遠近
多從之游所著有兌齋文集行於世汲郡王惲序之
曰先生之作其析理知言擇之精語之詳渾涵經旨
深尙體之工刊落陳言極自得之趣而又抑揚有法
豐約得所可謂常而知變醇而不雜者也 按元詩
小序稱其幼知力學早擢魏科旣而與元好問同掾

應州續志

卷八

十二

束曹機務控僖商訂文字未嘗稍輟則是哀宗天興
初曾官尙書省左司掾也其送李端卿詩云曾爲同
省掾偏愴遠離情可証舊志謂隱居不仕殆入元以
後事耶

國朝

左光圖字翼宸應州人篤學介行舉天啓辛酉鄉試授
河南嵩縣知縣光圖性至孝母早卒繼母薄常虐使
之光圖色愈恭雖呵責敬承不違薄寢愛如己出嵩
之破也光圖爲賊所得將殺之薄泣曰我繼母也兒

事我孝願以身代兒死先是光圖蒞嵩賊遣使持僞檄脅降光圖碎檄杖其使曰若當斬姑活若以語賊嵩邑官民誓且滅賊朝食矣比賊至登埤固守閱數月旁邑胥陷城遂破光圖投水中不死因奉薄入嵩山薄尋卒閒道奉柩歸葬蕭然自守屢日不火食泊如也工詩善書不輕贈荅親知餽遺之胥不受州守慕其品求一晤不可得著有知非集學步吟諸書

按史家列傳之體其人雖仕於前朝而卒於易世者俱載之後代觀宋元明諸史可知故列曹於元列左

於 本朝舊志悞

炳按郡志曹之謙通志左光圖俱載文苑今攷其實仍之曹之兌齋集左之知非諸集遍搜州境歷久竟不可得曹集幸有顧俠君元百家詩選尙留什一而左集因後裔衰弱邈無復存夫通都大邑士之著書立說傳播後世者賴有鄉獻之儲錄子孫之家乘耳應地僻陋文獻無徵前賢雖有一二殘編缺簡後嗣旣不能守而宗族閭黨又視爲無足重輕不深愛惜身死未幾楮墨卽漸滅無傳然則士之生於其鄉固

有幸不幸哉

應州續志

卷八

十四

列女

遼

邢簡妻陳氏營州人父陞五代時累官司徒陳氏甫笄涉通經義汎覽詩賦皆能誦尤好吟咏時以女秀才名之年二十歸於簡孝舅姑閨門和睦親黨推重有六子陳氏親教以經後二子抱朴抱質皆以賢位宰相統和十二年卒睿智皇后聞之嗟悼贈魯國夫人刻石以表其行及遷祔遣使以祭論者謂貞靜柔順

婦道母儀始終無歉云

見遼史列女傳舊志失載

應州續志

卷八

十五

明

劉氏州人賈雲衢妻夫歿氏年二十五歲苦志撫孤壽

五十五卒萬歷丙午旌表

見郡志舊志失載

國朝

按雍正四年以前已載舊志者不錄

鄭氏廩生曹森妻夫歿氏年二十六歲無子守節四十年壽六十六卒州牧竇容邃表其門

孟氏里民談繼先妻夫歿氏年十九歲無子以夫兄子為嗣守節三十四年壽五十二卒州牧吳超表其門

王氏里民王生芝妻夫歿氏年二十八歲撫孤成立守

節三十八年壽六十五學使蔣公表其門

邱氏里民白佐妻夫歿氏年二十二歲拮据撫孤現年六十八守節已四十六年

孫氏武生趙宓妻夫歿氏年二十四歲無子以夫兄子爲嗣撫之成立現年五十九守節已三十五年

張氏里民劉好古妻夫歿氏年十九歲偕孀姑陳氏撫孤陳氏現年七十張氏現年五十計張氏守節已三十一年

霍氏里民韓世榮妻夫歿氏年二十四歲無子奉繼姑

應州續志

卷八

十六

能盡其歡現年六十二守節已三十八年

劉氏生員朱秉曦妻夫歿氏年三十歲撫孤成立守節已二十七年

張氏生員王爾偁妻夫歿氏年三十歲撫孤成立守節已二十六年

張氏里民張祚宏妻夫歿氏年二十八歲三子俱幼撫之成立現年七十七守節已五十年州牧繆集吳炳俱表其門

張氏里民王宣璋妻夫歿氏年二十歲無子家貧舅姑

歿後就養母家以卒年五十八計守節已三十五年
何氏里民安恭妻夫歿氏年二十歲子生方六月撫養
成立現年四十八計守節已二十九年

張氏里民王傑妻夫歿氏年二十三歲撫孤成立現年
六十五計守節已四十二年州牧吳炳表其門

常氏里民董大公妻夫歿氏年二十七歲三子俱幼撫
之成立現年七十計守節已四十三年

魏氏里民劉行信妻夫歿氏年二十歲二子俱幼撫之
成立現年五十八計守節已三十九年

炳按易恆之六五觀之六二家人之彖皆以言女子
之德蓋家之正必自女始所謂家人利女貞也應雖
僻壤然閨闈之內是非羞惡之心無殊於通都巨邑
其矢志柏舟垂名綽楔必有其人乃雍正四年後請
旌之典無聞豈子孫限於時地抑司牧艱於彰闡歟
夫之死靡他茹荼如飴富貴貧賤舉無足搖動其心
豈復希冀後世之名而爲之子若孫者竟任聽湮沒
無傳何以慰幽魂而彰彝教予視篆以後屢經愷切
勸諭絕無應者爰採訪數人勒諸志乘藉以稍抒義

烈之光默補化源之缺將先聲所樹壺行益貞者闡
揚益盛卽爲代北風俗轉移之助非僅金城小補云
爾

流寓

明

沈良 浙江仁和人官刑部主事洪武三十一年謫

戍應州善春秋經術湛深士多受業門下若尚書石
增輩皆其門人

盛春 浙江海鹽人官監察御史洪武三十二年謫

戍應州博學能文慷慨不羈世業儒其孫桓爲大同
府學生

彭大有 河南陳州人官戶部郎中奉命督餉駐劄應

應州續志

卷八

十九

州明易學公餘講論不輟應士從遊者甚多舉人霍

慶芳輩皆出其門

以上見
田志

國朝

林贊王 字臯思莆田人知州友王之弟工詩善書畫

僑居應州二十年稔知學田所入無幾不足供修補

學宮之用捐所置大北頭村田地盡送歸學至今賴

之

見學田
碑記

炳按東南名勝之地多有文人墨士寄跡其間其騷

賦咏歌足以發山水之奇麗增都邑之光華所謂如

蘭在谷無地不芳者非耶若荒陬僻壤所至者非羈
旅無聊之人卽放廢窮愁之士已旣厭薄其地而人
亦不敬愛之其名與身同盡者比比也田志所載三
人或以謫籍久居或以因公暫寄然經術流溢教授
生徒彬彬稱盛地雖鄙陋亦曷不可以自見哉蕭志
缺而不書誤矣莆田林氏捐置學田亦好義之流也
附錄之

應州續志卷之八終

應州續志

卷八

二十